

SAN PABLO KARTA KOŁOSAS ÇXHABTEWE'SX JÏI

*Dxus yakh fxi'zesa Kolosas çxhabtewe'sxtxi
Pablo fxi'jni*

¹ Adxa' Jesukristo jxkaahnisa Pablo yaaseth, txã'wēte selpiwa'jsa Dxus nvxiitnisa.

² Txãa pa'ga Dxus luuçx Kolosas çxhabtewe'sx jïi naa karta's fxi'jçxa kajaçthu, Kristo's nwēese'jsawe'sxtxi weçxana yakthē'j Timoteo yakh. I'kwe'sxtxi' Dxus kwe'sx Tata' pu'çxhina, ewçxáa kaafxi'ze'jna.

*Dxus yakh fxi'zesawe'sx pa'gate Pablo Dxus
yakh puutx we'weni*

³ I'kwe'sx pa'gate Dxus yakh puutx we'weççxa', kwe'sxtxi nwe'wesa Jesukristo Tata's wala weçxa'tha'w bagaçxtewa.

⁴ I'kwe'sxa' Kristo Jesus yakh jxpubamée Dxus luuçx jxukaysa yakh puutx ya'peeygãhna ũsta' jïni'stha'w jiyu.

⁵ Txã'wē i'kwe'sx jïi cielute jxaawni ũsa' txã'sna jxpa'gaya' sũhçxane'kwe txã'wē ew fxi'ze', sa' Dxus yuwe ewte nvxiitwa'jsa isasa's pta'sxte wēse'jçxane'kwe cielutewe'sxa'sçxáa ũythasya' yajkx.

⁶ Dxus yuwe ewte nvxiit-sa's pta'sxnisa açxha' txakwe walaana u'jweça' naa kiwete mtee mteewa jxuka. I'kwe'sxwa Dxus peeygãani

isasa's pta'sxte', isasa yuhna sũhna jxpa'ganiijũjx, ma'wẽga pehnana u'j txã'wẽy yuuça'.

⁷ Kwe'sx yakhthẽ'j Epafxras Kristo's selpisáa txã'wẽk Dxus yuwe ewte nvxiit-sa's i'kwe'sxtxi kaapiya'j txã'sna iipe'ji'kwe. Txã' nyafxíi yu' kwe'sx yakhku mjii pu'çxsa yu'.

⁸ Txãak Dxus Espiritu yuuçxá's nwẽese'jna peeygãhna ũsta' jina pta'sx.

⁹ I'kwe'sx txã'wẽ ew fxi'zeni's pta'sxiyna, Dxus yakh puutx we'wena nestha'w yu' i'kwe'sx pa'gate, txã'wẽ Dxus yakh fxi'zewa'ja's kĩhte yuhwa jxpubamée wala ew jiyuçxa txãajũ ma'wẽ yuhwa txutemée fxi'zekahn.

¹⁰ Txãa pa'ga i'kwe'sxa' Kristo jiiyã'jçxa', txajx jxkaahni yuuçxá's jxuka kxtey yuuna ewçxáa fxi'zeçxa Dxus yakh fxi'zewa'ja's jweeíçxáa ew piyaane'kwe.

¹¹ Sa' txajũ' kĩhte yuhwa jxpubana nxusmée weçxana çxhãçxha fxi'zene'kwe.

¹² Txã'wẽ yũuçxa Dxusa's ũusuh jxuka weçxawa'ja's ji'phune'kwe. Txã' kwe'sxtxi jxpa'gawa'j pheu'jçxa ji'pha' txã'sa' ũsuna txã'sna nwẽese'jsa yuutxi' jxukaysatx.

¹³ Txãak çxhi'dxte fxi'zena ũstewa, txajũ kutxi'jçxa txajx Nçxi'k wedxnisa tasxte nvxiht,

¹⁴ txajx Nçxi'k peltunãyçxa nwe'wenisatha'w naa pa'ga.

Kwe'sx pa'gate Kristo uupa'ga Dxus yakh yu-uwemée neeyũuni

¹⁵ Dxusa' kwe'sx yafxte vxyaasame', nawa vxyaaya' kĩjk txajx Nçxi'k Jesukristo kakwete.

Txãasa Kristo' Dxus íçxá', naa kiwete kĭjkĭhtewa thaakwe yaçtewe'sx.

16 Dxusa' txajx Nçxi'k Jesukristo'sku neewe'weçxa nvxiht naa kiwe, cielu, kĭjkĭhçxah ũstxna, kwe'sx yafxte vxyaasáa vxite' kwe'sx yafxte vxyaasamée txãatx jxuka txãaçxaçxáa vxitkahn. Txãa pa'ga kĭjkĭhwa jxuka Kristo jĭita' txajx vxitnisa, sa' txã'sçxaçxáa nwēese'jwa'jsata', eçxthē'j ma'tx yuu angeleswe'sx ma'tx yuu nawa jxuka.

17 Naa kiwe meetey Kristo' ũsyã'kh yu', sa' açxwa txãa íçxáa ũsa', txajx pa'ga yuuçxáa kĭjkĭhwa jxuka ewçxáa ũsta'.

18 Sa' Kristo's jxpa'gaçxa txãa yakh fxi'zesa maazkuēesatxwa jxuka Kristo íçxáa jxkaahsa'. Txãak nyafxtewe'sx yu', sa' txãa íçxáak uuçxawa nyafxte ki' ĩtxi yuu, txãaçxaçxáa bagaçxtewa jxkaahwa'jsa.

19 Dxusa' Kristo's kaakh, nawa le'çxkweçxáa yuhwa vxitemée, Dxus íçxáak yu'.

20 Sa' Dxusa' maa yuhtxwa nvxihtmée, naa kiwetewe'sx kĭjkĭhwa jxuka Kristo's ahçemée yuwe ewuuna pa'jwa'ja'sku vxit, Kristo's kluuste uuwa'j vxitçxa.

21 I'kwe'sxwa nyafxiaa' Dxus luuçxmée i'kwe yu', Dxusa's açewa'jçxá's yajxna fxi'zesa, ewmeeçxáa yũuna. Nawa ewmeesaçxawa açxha' Dxus tasxte pa'jya' ājawa'ja's Dxusíi pheu'kh,

22 txã'wē Kristo's pxthaa yuuçxa uuwa'j vxitçxa. Naasáa kwe'sx kĭh pkal yuhwa ji'phmée txajx tasxte yuuçxáa selpiina fxi'zekahnku

txã'wẽ yũu.

²³ Aça' txã'wẽ ew fxi'zeya' ãjaya', Kristo yuuçxá's iiméh ew ũusuh jxuka yajxna tx-ajx yuwe ewsa nwe'wewa'jsa pta'sxni's jii i'kwe txajũ txutenuwe. Txãa Dxus yuwe ewsa nwe'wewa'jsa's txã'wẽ mtee mteewa jxuka pta'sxni yuuça', aça' txã'sna pta'sxkahnku Dxusa' nvxiht adxa's.

Dxus luuçtxxi selpiikahn Dxusa' Pablo's neewe'weçxa nvxiitnisa

²⁴ Txãa pa'ga Dxus yuwe's i'kwe'sxtxi pta'sxpa'ga pxthaa yuuna ũsçxawa, wala weçxa'th. Nawa adx pxthaa yuuwa'j yuutxi's wa'luçmeeth. Kristowa ma'wëga txajx nasaa pa'gate pxthaa yuuçxa uu txãa pa'ga adxwa pxthaa yuuwa'jsath.

²⁵ Dxus luuçtxxi selpiwa'jsak Dxusa' adxa's neewe'weçxa nvxiht, Dxus yuwe's i'kwe'sxtxiwa pta'sxkahn kîhte yuhwa peejxmée jxuka.

²⁶ Txãniitey bagaçxte yuhwa kaajiyu'jnimeesa ũsu'ne' txã'snak Dxusa' ãçxha' kaajiyu'j txajx nasatx, aça' txã'sna pta'sxwa'jsath.

²⁷ Dxusa' txajx yuwe kaajiyu'jnimeesa iiméh wala selpiwa'jsa yu'k judiu jii'mée vxite nasatxwa txã'snak kaajiyu'j txajx nasatx. Txã' naak yu': Kristo' i'kwe'sx ũuste u'kak, txãa pa'ga i'kwe'sxa' Dxus tasxte pa'jwa'ja's ji'phi'kwe jina pta'sxni's i'kwe jiiimée yu'.

²⁸ Aça' Kristo i'kwe'sx ũuste khëeni'stha'w kwe'sxa' pta'sxi', yu'kxpehna, kaapiya'jna, jxukaysa wala ew jiyuçxa teeçxsa na'wëçxah

Kristo yakh yuuçxáa jxpubamée fxi'zewa'ja's ew piyakahn.

²⁹ Txã'wē yūuwa'ja's kaapiya'jnath txakwe wala çxhãçxha mji', Kristo kīhtewa jxuka pu'çxte.

2

¹ I'kwe'sxa' mjiyuwe: Adxa' i'kwe'sx pa'gate vxite' Laodiceatewe'sx vxite' adxna jiimeesa ũstxna txãawe'sx jxukaysa pa'gate iiméh wala pa'pçxuna Dxus yakh puutx we'wena ũsthu.

² I'kwe'sx jxukaysa Kristo ma'wēsatewa kīhte yuhwa peejxmée jxuka ew jiyukahn txã'wē pa'pçxuna ũsthu. Txãa Kristok i'kwe'sx ũuste khēewa'jsa yu' txã'snak txāniitey kim yuhtxwa kaajiyu'jnimée ũsu'. Aça' txã'sna ew jiyuçxa' jxpubamée i'kwe'sx pwe'sx puutx ya'peeygāhna fxi'zene'kwe.

³ Txãa pa'gatey ma'wēçxah jiyuwa'j peejxtewa, Kristo yuuçxáak ũsu'.

⁴ I'kwe'sxtxi' txã'wēth ew āate pta'sxi', vxitesa ĩsxiina zhiçxkwe we'wena kaypuba'jwe'sxte.

⁵ Adxa' i'kwe'sx yakh ih ũsmeeth, nawa i'kwe'sx yakh ih ũs na'wē yajkxna ũsthu ũuste yu', txāasath wala weçxá', Kristo yakh yuuçxáa jxpubamée fxi'zepa'ga.

⁶ Txãasa Jesukristo's ma'wēkwe nyafxíi weçxana jxpa'ga txã'wēesa mfxi'zewe txāa yakh txutemée.

⁷ Bagaçxtewa Kristoçxá's yajkxna txāa yuuçxá's nwēese'jna Dxusa's weçxana fxi'zewa'ja's i'kwe kaapiya'jni yuu, txajū txutenuwe.

Kristo itxi yuupa'ga kwe'sxwa pkaluh itxi yu-uni

⁸ Txãasa i'kwe'sxa' wala mpa'yajkxwe, naa kiwete nasaa pwe'sx yajkxçxa kaapiya'jniçxá's pta'sxna kaypuba'jwe'sxte. Txãawe'sxa' Kristo kaapiya'jni's kaapiya'jsamée, ewmeesa jxkaahniçxá's kxte yuusata'.

⁹ I'kwe'sxa' txã'wě kaapiya'jni's nwěese'jwa'jsa meei'kwe, txãa pa'gatey Kristo' Dxus ma'wēsatewa txãawa txã'wěysaíçxá'.

¹⁰ Aça' i'kwe'sxa' txã'sna ũuste jxpa'ganijũ' Kristo yakh teeçxçxáa i'kwe yuuna pa'ja'. Txãa pa'ga jwee yu' vxite yu' kīhwa peejxmée yã'ji'kwe, txãa pa'gatey Kristoçxaçxáa jxuka jxkaahsa' naa kiwetewe'sx vxite' ēe walasu ewmeesa ũstxna txãa yã'jçxa.

¹¹ Kristo's ũuste jxpa'ganijũyã'ja', cirkuncidāyni na'wě yã'ji'kwe neeyũ'. Nawa peekx kakwetewe'sxna cirkuncidaĩ'tx txãamée, i'kwe'sx ewmée yũuna fxi'zenijũ Kristo nwe'wenisa cirkuncidāyni yaase'. Kristo' txã'wěçxáak yu'.

¹² Txã'wě yũunijũ' i'kwe'sxa' yu'te ya'bautisãyçxa' Kristo yakh ja'da pedani na'wěsa i'kwe yuu, sa' Kristo yakh ja'da ki' itxi yuusáa na'wě i'kwe yuu, txã'wě Kristo uutewa Dxusa' ki' itxi vxitku sūhwa'ja's ji'phui'kwe naa pa'ga.

¹³ Nawa nyafxí yu' i'kwe'sxa' pkalpa'ga Dxus dxi'pte uuní na'wěi'kwe ũsu', pkaluh txudenimée. Txã'wětewa açxha' Dxusa' pkaltxi jxuka peltunãypa'ga i'kwe'sxa' Kristo na'wěy itxi yuusáa na'wě i'kwe yuu.

¹⁴ Kwe'sxa' Dxus jxkaahni's

nwēese'pha'gamée yuuwesane'tka'w yu'. Nawa Kristo kluuste uupa'ga Dxusa' jxuka peltunāyku.

15 Sa' txā'wēçxáa yuumée, eçxthē'j txāa yakh ūssa yā'jçxa jxuka knayçxa Kristoçxaçxá's багаçxtewa nwēese'jwa'ja's vxitçxak nvxiht Dxusa'.

*Naa kiwetewe'sxa's nwēese'jmée
cielutewe'sxa'sçxáa mpaakwewe*

16 Txā'wē Kristo nwe'wenisa yā'ja' āçxha' kim yuhwa leya's nwēese'jwa'ja's jxkaahwa'j ji'phmeeta', i'kwe'sx ū'ni's we'wena meeçxa' ki'swa'j en txā'wēsatsx.

17 Txā'wē yūunisa' naasáa teeçx pa'jwa'jsa ūsu'k txā'sna jxpa'gawa'ja's kaapiya'jsaçxáatx yu'. Aça' ew jiyute yu', txāa pa'jwa'jsa' Kristok yu'.

18 I'kwe'sxa' ĩsxiisawe'sxtxi mpa'yajkxwe. Txā'wēme', txāawe'sxa' wala ewsatha'w jīna angeleswe'sxtxi neewe'wena, kīhwa uysameeçxawa txā'wē ewsaxçá's ĩ'khsatha'w jīna iiwejçx we'wena i'kwe'sxtxi kaypuba'jatxna.

19 Txāawe'sxa' Kristo yakh fxi'zesameeta'. Kristo yakh fxi'zewaç yu', wala yuh ewna, txāa pa'gatey Kristo kīhtewa jxuka kçxhāaçxha'jna txajx nasa yuutxi' jxpe'jsa', Dxus jxkaahni's kxtey yuuna.

20 I'kwe'sxa' naa kiwete piçthē'jwe'sx we'weni's nwēese'jya'mée, Kristo yakh ja'da uusáa na'wē yuusáa i'kwe. Sa' çkījxa'çxáa piçthē'jwe'sx we'weni's nwēese'jwa'jsamée yā'jçxa', txāawe'sx txā'jīna jxkaahnitxi' nwēese'jna ūsuki'kwe?

²¹ Txãawe'sxa' na'wêtx jxkaaja': Txã'sa' jxa'dxnu, txã'sa' ũ'nu, txã'sa' jxpa'ganu jĩna kĭjkĭhwa wala jxkaaja'tx.

²² Txã'wê jxkaahnisa' naa kiwete piçthê'jwe'sx kaapiya'jnisaçxáata', jxuka skhêwwa'jsa.

²³ Txãatx jxpa'yakxmeete', ewsa na'wê yuh theguna, txãa pa'gatey iiwejçx yajkxmée peekx kakwe's ew kaafxi'ze'jwa'ja'sku jxkaaja'. Nawa naa kiwete ewmée yajkxna fxi'zeni's yu' neeweya' ãja'çme'.

3

¹ I'kwe'sxa' Kristo yakh ja'da ĩtxi yuusáa na'wê yuusáa yã'jçxa', cielute iiméh zhiçxkwesa багаçxtewa wêť fxi'zewaja'sçxáa mpaakwewe, Dxus pukate Kristo ũsnitewe'sxna.

² Naa kiwetewe'sxa's yajkxmée, cielutewe'sxçxá's myajkxwe,

³ txãa pa'gatey i'kwe'sxa' Kristo yakh ja'da uusáa na'wê yuupa'ga, Kristo yakh fxi'zeçi'kwe Dxus tasxte.

⁴ Sa' i'kwe'sxtxi ĩtxi kaafxi'ze'jsa Kristo vxyaate', i'kwe'sxwa txãa ma'wēsate' txã'wēysa yuuçxa txãa yakh ih ũsya' u'jwene'kwe.

Ewmeesatxi' nvxihtçxa ew yũuna fxi'zenitx jxpa'gani

⁵ Txãa pa'ga i'kwe'sx ũus yaakxni ewmeesa naata' txãatxi' jxuka manvxihtwe: ptamumey pkalte fxi'zeni, ptamsaçxawa vxitesa yakh pkal yũuna fxi'zeni, kĭhwa ewmée yũuwa'jçxá's yaakxni, Dxus yu's yajkxmée jweeíçxáa ji'phu

wēena fxi'zeni, (txã'wē ji'phu wēeniçxá's ya-jkxte', txã'sçxáanak Dxus na'wē yaakxwa'j kaseje'.)

⁶ Txã'wē ewmée yūupa'ga íiçxáa Dxus kastigo seena'sa yuja' Dxusa's nwēese'jsameewe'stxxi.

⁷ I'kwe'sxwa txã'wē yūuna fxi'zesai'kwe yu'.

⁸ Nawa āçxha' na'wēsax jxuka manvxihtwe: pxūuskwe yaakxni, ūusçxani, vxitetx ewmée nuywe'weni, wēesxuni, kazx we'weni txã'wēsax.

⁹ Txãa pa'gatey jxuka nvxiht yã'ji'kwe na'puutx ya'isxiina fxi'zemée,

¹⁰ ewçxáa yūuna fxi'zewa'ja's jxpa'gaçxa ūsi'kwe. Txã'wē yūuçxa' i'kwe'sxa' jweeiçxáa ya'yu'pthehna u'jwene'kwe, Dxusa's ew jiyuna pa'jçxa txãa na'wēy yuuna pa'jya'.

¹¹ Aça' txã'wē ya'yu'pthehnisa' maawa jxuka kxteeçxah teeçxçxáa yuuna pa'jsata'. Judiuwe'sx ma'tx yuu, judiuwe'sxmée ma'tx yuu, cirkuncidāynisawe'sx ma'tx yuu, cirkuncidāynimeesawe'sx ma'tx yuu, wala jiisa ma'tx yuu, jiimeesa ma'tx yuu, patron ji'phsa ma'tx yuu, patron ji'phmeesa ma'tx yuu nawa maawa jxuka kxteeçxah teeçxçxáa yuuna pa'jsata'. Txãa pa'gatey Kristo's jxpa'ganiçxáa txã'wē', Kristo jxukaysawe'sx jĩ'.

¹² I'kwe'sxa' Dxus peeygãhçxa txhitxnisai'kwe, txãa pa'ga i'kwe'sx ūuste na'wēsax jxpa'gaçxa mfxi'zewe: vxitetx peeygãawa'ja's, pu'çxna fxi'zewa'ja's, iiwejçx yajkxmée maa yakhwa jxuka ewçxáa fxi'zewa'ja's, puutx ūusçxa ya-jkxmée fxi'zewa'ja's.

¹³ Makwe ewmée nuywe'wetewa puutx

ya'peltunãyna mfxi'zewe. Kristowa ma'wëga i'kwe'sxtxi peltunãy txã'wëy myũuwe i'kwe'sx pwe'sx.

14 Sa' peeygãhna fxi'zewa'j yuuçxá's kïhtewa thaakwe wala mji'phuwe. Txãa maatewa thaakwe peejsa'.

15 Txã'wë yũunijũ' Dxusa' ũsuna jxukaysa kxteeçxah ũuste wët weçxana fxi'zewa'ja's. Txã'wë jxukaysatx kxteeçxah teeçxçxáa vxitya'íçxáak Dxusa' i'kwe'sxtxi txhitxh, txãa pa'ga mwëeçxawe.

16 ãçxha' Kristo kaapiya'jni's i'kwe'sx ũuste jxuka mpiyawewe. Txã'wë yũuçxa puutx kaapiya'jna, wala jxpa'yakx puutx yu'kxpehna, Dxusa's ũuste weçxana memna mfxi'zewe.

17 I'kwe'sxa' kïh yũuna ũsçxawa, Kristo Jesusa's tuuthe'jwa'ja's yuuçxáa myajkxwe, Dxusa's yuuçxáa weçxana.

Yattewe'sx maa yakhwa jxuka ya'nwëese'jna fxi'zeni

18 Nyuuwe'sxa' i'kwe'sx nmi'tx nwëese'jwa'j ji'phi'kwe. Kristo's jiiyã'jçxa', zhiçxkwe fxi'zewa'ja'.

19 Aça' nmi'we'sxwa peekx nyuu yakh puina yahçemée peeygãhna mfxi'zewe.

20 Txã'wëy luuçxwe'sxwa i'kwe'sx neywe'sxtxi kïhtewa jxuka mwëese'jwe. Txã'wë yũuni's Dxusa' weçxa'k.

21 Neywe'sxa' peekx luuçxtxi zhiçxkwe yu'kxpehna miipe'jwe pkxuumée, i'kwe'sx yakh kuçxkahmen.

²² Selpisaawe'sxa' naa kiwete i'kwe'sx patronwe'sx jxkaahnitx wa'lmée mwēese'jwe kīhtewa jxuka. Patronwe'sx thegna ūste āajuçxáa nwēese'jmée, ūsuh jxuka wa'lmée mwēese'jwe, Dxusa' jiina sūhna.

²³ Kīh mjīiççxawa wa'lmée Kristo's selpiiçthu sūhnaçxáa kxtey myuuwe, nasatx selpiiçthu sūhmée.

²⁴ Txã'wě yajkxna selpiipa'ga, Kristo' i'kwe'sxtxi' cielute deweena, txãa pa'gatey Kristo jīi sūhçxane'kwe mjīi naa pa'ga.

²⁵ Nawa maawa wa'l yajkxna mjīisa' açxamée ewsaçxá's jxpa'gatxna, txãa pa'gatey Dxusa' jxuka jiia' ma'wě yūuna fxi'zesatewa.

4

¹ Patronwe'sxa' i'kwe'sxtxi selpisaatx ewçxáa jxpe'jna meswe. Txã'wěme', i'kwe'sxwa selpisáa iïçxáa i'kwe, i'kwe'sxtxi jxkaahsa' Kristo cielute ūsa'.

² Açxha' wala jxpa'yakx Dxus yakh yuuçxáa puutx we'wena meswe, peçxkanamée Dxusa's weçxana.

³ Sa' kwe'sx pa'gatewa txã'wěy Dxus yakh puutx we'wena meswe, Dxus yuwe pta'sxwa'j en vxyaakahn, kxah Kristo's ma'wě ūste jxpa'gawa'ja'swa jiyunimeesa's pta'sxi'nja. Txã'wě pta'sxpa'gaiççxáa adxa' preesu ūsthu.

⁴ Nawa Dxus pu'çxte', sxiigmée ew āate kaa-jiyu'ju'nja.

⁵ Dxusna jiimeesawe'sx yakh wala jxpa'yakx ewçxáa mfxi'zewe, ewmée we'wekahmen. Sa' Dxus yuwe pta'sxwa'j ena's ivxiitnuwe.

6 I'kwe'sxa' zhiçxkwe ewçxáa jxpa'yakx mwe'wewe. Txã'wẽ yũuçxa', ma'wěsa yakhwa thëymée pasya' ãjane'kwe.

Yuwe weçxaa kaahnitx fxi'jni

7 Kwe'sx yakthē'j Tíkiko Kristo's selpiik adx yakh ja'da kīhtewa pu'vxitumée pu'çxna txã' i'kwe'sxtxi pta'sxina adx fxi'zeni's.

8 Txã'wẽ pta'sxna i'kwe'sxtxi kçxhãaçxha'khan kajaçthu.

9 Txãa yakh teeçx pi'kxna yuja', Kristo's jxpa'gasa kwe'sx yakthē'j Onésimo. Txã' i'kwe'sx çxhabteywe'sxa'. Txãawe'sx pa'jçxa jxuka pta'sxixna aysũ kīhçxah yũuçtewa.

10 Karcelte adxna pi'kxna ũssa Aristarkowa yuwe weçxa kaja'k, vxite' Bernabé pukakhē nyakh Markoswa. I'kwe'sxa' jiiyã'ji'kwe Markos ma'wěsatewa, txãa pa'ga wa'lmée mpa'gawe.

11 Jesus Justo jĩ'tx txãawa yuwe weçxaa kaja'k. Judiuwe'sx Kristo's jxpa'gasa adxa's pu'çxsa yu' txãawe'sx yuuçxáatx yu', Dxus jxkaahwa'ja's pta'sxsa. Txãa pa'ga adx yakha' wala weçxa yuja'.

12 Kristo's selpisáa Epafxraswa yuwe weçxaa kaja'k. Txã' i'kwe'sx yakh ũssak yu'. Txã' i'kwe'sx pa'gate bagaçxtewa Dxusa's neewe'wena nesku yu', kīhtewa jxpubamée Dxus jxthãasniçxá's kxtey yuuna fxi'zekahn.

13 Adxa' jiith Epafxrasa' i'kwe'sxtxi yajkxna wala pa'pçxu'k, Dxusa's neewe'wena. Sa' Laodicea çxhabteywe'sx vxite' Hierapolis çxhabteywe'sxtxiwa txã'wěyku Dxusna neewe'we'.

14 Médiko Lukas vxite' Demas txãawe'sxwa yuwe weçxaa kaja'tx.

15 Yuwe mweeçxawe yakhthê'jwe'sx Laodiceatewe'sxtxi vxite' Ninfxasna, sa' txajx yatte pkhaakhesawe'sxtxiwa txã'wēy.

16 Naa karta's i'kwe'sx pwe'sx lēeyna jxã'jçxa', mkaahwe Laodicea çxhabte pkhaakhesawe'sx lēeykahn, sa' Laodicea çxhabtewe'sxtxi karta kaath txãa karta i'kwe'sx tasxte pa'the', txã'snawa mlēeywe.

17 Arkiposa's na'jīna myu'kxpehwe: Kristo mjīia's kxtey myuu jīna.

18 Adx kuseju yuu naa karta's fxi'jçxa kajaçthu i'kwe'sxtxi weçxana. Nawa adxa's peçxkanamée yajxna mfxi'zewe, preesu ũsthu naa pa'ga.

I'kwe'sxtxi' Dxusa' pu'çxhina.

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 18 Apr 2025 from source
files dated 29 Jan 2022

06da09f4-8d0f-5001-ae8c-0e6aa0131ffd